

耀州志

一
玉
册
函

喬三石耀州志第三卷

建置志 祠祀附

元末兵亂州治盡燬官就夏侯堡治事者五年洪武二年知州魏必興至乃重建州治翰林編修金華王禕記正中爲州堂左爲吏目廳右爲鄧侯祠爲土地祠東西爲六房前爲儀門儀門內中爲戒石亭右側爲獄房外左側爲督糧廳爲馬廐堂後爲退思堂堂東西爲庫房二又後北爲知州宅東爲同知西爲判官西南爲吏目宅又南爲吏舍嘉靖二年省同知同知宅今易爲民居嘉靖三十二年知州李廷寶以故

退思堂小且久益壞乃改建五間自爲記退思堂後
有蓮池池西有亭嘉靖十八年知州溫秀作者

大門就門上爲鼓樓宋天聖時節度使薛中大始建
未作臺金承安中昭勇將軍僕散誨列更爲臺門學
正王師古記尋亦燬洪武二年知州魏必興三十年
知州高永登皆因舊址修至弘治五年知州任奎盡
撤其舊創修之樓始大中允清平張天瑞記州故無
鐘樓鐘懸西門上屋中嘉靖三十四年地震屋壞鐘
露懸

旌善廳 申明廳各三間始建州前丁字街兩旁後

徙鼓樓下

廳南正中小屋三間對鼓樓門如屏壁然不知建自何時屋下置大石曰泰山石人言南門直對州門於法爲衝故作法厭勝云

儒學在北城下東文廟西山壽寺宋嘉祐時知州史炤建元祐中知州王瑛重修教授李注記元末盡燬有明洪武三年知州魏必興再建成化十一年知州鄧真始大修之規制益閎提學副使伍福記弘治八年知州任奎再修張天瑞記中爲明倫堂堂後爲講堂堂前東爲訓導齋二西爲訓導齋一饌堂一各三

間東西號舍四十四間今廢且盡倉房吏舍共六間
今盡廢中門有左右門前爲大門學正宅在明倫堂
左後訓導宅三一在文廟神厨後二在學前北向正
德中省一訓導學前一宅廢後神厨與學前二宅俱
廢嘉靖二十五年知州周廷傑以學前廢宅作官地
易粟罷矣今二訓導居東西號舍中又傾敝無完舍
三十三年知州李廷寶就東西號舍俱增屋三間爲
訓導宅又於學前建射圃廳三間嘉靖三十四年地
震學堂齋多壞李廷寶自以紙贖四十金修葺兩齋
已又以大門低更增高大門三十九年知州江從春

始大議修舉乃卽撤故講堂改建

敬一亭亭後創建尊經閣國家頒賜經史御制諸書
與諸別購圖籍貯其上已乃修明倫堂與齋廡二門
已又創作泮池引通城渠水注之池南又特建石坊
門左右與文廟前又各建石望柱二堂基增數尺閣
基高與城齊今升堂卽望見南山登閣則四望益遠
學至是始恢廓壯麗飾觀矣又石刻科貢題名歸復
廟學前隙地改闢學垣改建射圃廳事皆足啟觀望
而作士氣者其役費規畫詳在余所著修學記碑中
余覽元至順時文廟碑陰載學田六頃鞏村三頃唐

家堰二頃茹家社一頃入有明無此田矣

布政分司在州治西舊在東門建自正統五年知州劉彧弘治五年知州任奎以漆水壞城乃西徙

察院在東門內洪武九年同知陳季鏞建

西安行府在州治南洪武三年知州魏必興建

順義驛在府署南舊名鑑山驛後更今名永樂二年碑猶稱鑑山知州江從春分其北半改建按察分司稅課局洪武三年建宣德四年碑猶載局官不知後何年省去局地亦不知所在

預備倉 豐盈倉在州治西洪武末知州高永登始

建成化時知州鄧真增修倉房至五六十間今廢者已十之八矣

總舖在驛南先在州門南街東嘉靖九年知州陳文學徙此州北十里曰孝家莊舖通同官州南卽富平境入三原無耀州舖

陰陽學 醫學在城隍廟西小街洪武十七年始建府署北嘉靖五年知州陳維徙此

養濟院在城隍廟東弘治中自舊府署北改建此

僧正司在山壽寺 道正司在州治後新街太白觀俱建自洪武三年寺則僧行鏡行壽明銳相繼凡三

修今淨賢又募邱藏經來顧觀日就廢道士亦無常住者

社學 義倉 桑棗園里各一俱洪武末知州高永登建者今社學獨在而里尚存其始在州治南弘治七年知州任奎改建北門內東小街嘉靖九年知州陳文學乃徙今布政司西舊草場地今草收預備倉中各里中社學與義倉桑棗園俱盡廢在同官富平者亦皆若是云

演武場在東城外靜明觀道士常住地中舊自南門外改北門外皆民田嘉靖二十年知州楊煦以玉皇

閣官地易此

漏澤園在北城外東北一里

文正書院在北城外二里步壽原巖下故明德寺也
今故塔存嘉靖二年知州趙時改建者提學副使唐
公龍記記曰始知州趙時議變置佛宇廣弟子舍乃
請於都御史灤江王先生王先生曰是義事也宜丞
成之又曰宋文正公仲淹初知邠州慶州後知耀州
今邠人慶人咸尸祝之顧耀州祠獨闕吾懼人無所
繫其思矣丞遷土佛葺其宇卽中以爲公祠外因齋
廡居弟子員吾將巡功焉知州乃奉命改殿爲祠祀

文正公榜仍其材爲廡各九楹東曰經義西曰治事
令弟子肄習其中命曰文正書院後知州溫秀卽塔
上題舉人名曰他日當爲小雁塔自嘉靖己酉後士
無遊此者今堂與門俱漸敝碑亦斷東西廡盡廢往
己卯壬午時士望舉顧不得舉自癸未未有書院乃乙
酉卽舉二人余濫其中戊子辛卯庚子癸卯各二人
甲午三人丁酉己酉各一人頃丙午壬子乙卯皆無
舉者人皆以書院廢也古稱地靈者豈不信哉余故
志之俟後有興復者可覽觀焉

夏侯堡

舊傳夏侯嬰居此亦無攷

在州南二十里元末州治燬官

治事於此後空無人嘉靖二十五年復築堡城

小丘堡在州西北四十里亦嘉靖二十五年築者二堡蓋上官奉朝議爲備虜計云

岸門在州西北八十里分水嶺上嘉靖三十二年叅政張渙以虜報急乃令知州李廷寶築此然塗者由七里川行卽不經岸門

祠祀

文廟宋嘉祐中知州史炤建元延祐中刺史張仲重修太常廉悻記元末盡燬獨古柏數十株存國朝洪武五年知州魏必興重建廟殿九年同知陳季鏞建

兩廡三十四間櫺星門戟門庖庫皆備鏞蓋撤東嶽
祠兩廡爲之俱常經記宣德四年知州胡思魯重修
學正馮宣記成化十一年知州鄧真大修之殿增至
七楹崇四十尺增兩廡各二十楹正殿戟門櫺星門
覆瓦獸脊皆琉璃修故文昌祠三間創神厨五間自
是規制益閎提學副使伍福記記言鄧真肇工時匠
師方慮乏材民來獻大木以百數計若待用者耀州
諸修建惟此爲壯麗云今殿與門廡日漸敝神厨廢
已十年

文昌祠學正

謙建今改啟聖祠

社稷壇在城西北 風雲雷雨山川壇在城南

郡屬壇在北門外三壇俱洪武三年知州魏必興建
又里屬壇各在其里中

城隍廟在州治南亦知州魏必興建成化十七年知
州鄧真重建弘治七年知州任奎修嘉靖三十四年
州人又增修石門舉人張蒙訓記其畧曰國家祀典
有廟有壇惟城隍與孔廟並建守臣至則齋戒宿廟
中祭而誓辭焉而後蒞任朔望日又行香益虔及春
秋有事則迎主於山川壇並祭之而饗厲鬼又以城
隍主焉是城隍之祀兼廟與壇也我聖祖制禮之意

深遠難窺然州人則以八月二日報賽城隍云祭備
方物樂兼男女駿奔者動乎一境豈非神靈之感而
自然之應邪

鄉賢名宦祠舊在文廟東祠卑隘又二祠同所名義
未安知州江從春改建文廟西南各爲祠祠各三間
范文正公祠在文正書院

八蜡廟在州西三里茹家社卽故晉公廟嘉靖九年
令州縣皆立八蜡廟知州陳文學奉令改建焉

東嶽廟在北門外東北

歲以三月二十八
日爲報賽之期

同官

縣治在城西北隅中爲正堂東典史廳西鑾駕庫前
東西爲六房六房吏任舍卽各在其後又前爲儀門
儀門內中戒石碑亭東土地祠馬廐西獄房又前爲
大門就門上爲鼓樓堂後有中堂中堂西爲書屋後
爲知縣宅鑾駕庫東爲主簿宅東爲門門南有隙地
西爲崇積庫庫西南爲典史宅

旌善廳 申明廳在縣大門外鼓樓下

儒學在縣東南宋遺址洪武八年因建焉中明倫堂
前東西兩齋齋東南號舍今廢堂南卽文廟堂後爲
敬一亭亭東西爲教諭宅 學倉廢

察院在縣治南 布政按察二分司俱縣治東

漆水驛在縣治東北 驛倉舊在驛今廢

醫學在縣治東 陰陽學闕

僧會司在重興院 道會司在清寧觀俱城中

預備倉在縣治西南 社學在文廟前西

射圃在文廟前東 草場 桑棗園 總舖俱廢以北

抵宜君三舖曰曲掌神水赤渠南抵州五舖曰雷平飛仙佑佐朝陽豐潤

演武場在北門外

崇正書院在縣東北一里故頻山寺嘉靖八年御史

王儀行縣改書院顧有司承事不力久未成